



Kamis, 8 April 2021

Ogen: Johanes : 21:15-19



"Permakani Biri-biri"



Lirik pemenang lagu KEE 312, nina "Permakani k'rina biri-biringKu, bagem pedah Tuhan man banta kerina..." Ngerana kerna temata sendah, kepeken enda nggo jadi sada tugas man banta kerina i bas kita ndalanken pedah Tuhan. I bas kerina kelepaken kegeluhenta, i bas kerina kekoten kegeluhenta, tugas kerna mpermakani biri-biri enda nggo jadi sada kewajiban nandangi kerina kita biri-biriNa. Kata enda pe ipeseh Jesus nandangi Simon Petrus i bas bahan perenungenta Johanes 21:15-19. Telu kali isungkun Jesus Simon Petrus e kerna kekelengenna nandangi Jesus. Telu Kalina ijabab Simon, " Keleng Tuhan, ietehNdu kap maka Keleng ateku Kam." emaka telu kalina ka Jesus nuruh Simon guna mpermakani biri-biriNa.

Penungkunen si cukup penting eme, Keleng nge ateta Jesus e? Pasti sijabab, keleng! Adi bage enggo nge sedekah enda sipermakani biri-biriNa e?, banci saja lit kita si sinik nandangi penungkunen enda. Ue tuhu, sedekah enda lenga kel aku mpermakani biri-biriNa. Ngukuri bangku saja, nggo melimber kuakap. Mungkin lit si bage perukurenta. Kekelengen ni Tuhan, biri-biri Jesus e , eme kita kerina. Adi iajuk kita guna mpermakani biri-biriNa berarti kita harus nggit jadi pasu-pasu man jelma sideban, salah sada cara mpermakani biri-biri e eme kap nggit muat bagin jadi Perberita Simeriah, enda me tugasta.

Adi Keleng ateta nandangi Jesus e, mari ikutlah muat bagin guna meritaken berita simeriah, kerina kekotenta pasti isampati Dibata, bas kinilangasupenta jadi perberita e tentuna lit penampat Dibata, payo entah lang? Nggit kam entah lang? Radu ras kita meritaken berita simeriah e gelah kekelengenta nandangi Jesus pe ertambah-tambah, e maka ersikaplah mpermakani biri-biriNa.